

MISSALETTE



12 Abril 2026 • IKA-2 LINGGO NG PASKO NG MULING PAGKABUHAY
• KAPISTAHAN NI KRISTO, HARI NG BANAL NA AWA • Taon A, B, K



SI KRISTONG MULING NABUHAY BUKAL NG WALANG HANGGANG AWA

Sa Ikalawang Linggo ng Pasko ng Pagkabuhay, ipinagdiriwang natin ang Kapistahan ni Kristo, Hari ng Banal na Awa— bilang pagtugon sa kahilingan ni Santa Faustina Kowalska at sa ating malalim na pangangailangan sa kapatawaran ng Diyos. Pinatitibay ng araw na ito ang ating pagtitiwala sa Muling Nabuhay na Panginoon at sa Kanyang walang hanggang awa. Habang nakikibahagi tayo sa Banal na Eukaristiya, nawa’y mangako rin tayong ipakita ang awa na ating hinihingi—sa ating pagpapatawad sa mga nagkakasala sa atin at sa pagsasagawa ng mga kawanggawang pangkatawan at pang-espirituwal upang ang ating pagmamahal sa kapwa ay maging tunay na katulad ng kayKristo.

PASIMULA

PAMBUNGAD

(Ipahahayag lamang kung walang awiting nakahanda.)

Marangal n’yong katayuan tanggaping may kasiyahan. Ang D’yos ay pasalamatán sa pagtawag n’ya’t paghirang. Aleluya s’ya’y awitan. *(4 Esdras 2, 36-37)*

PAGBATI

P –Pagpalain si Hesus na Hari ng Banal na Awa. Ang kanyang kapayapaan at pagmamahal ay sumainyong lahat.

B – At sumaiyo rin.

PAGSISISI

P –Sa pagtitipon natin bilang mag-anak ng Diyos, hilingin natin ang pagpapatawad ng Panginoon upang maialay natin ang Eukaristiyang ito nang may malinis na puso. *(Manahimik sandali.)*

P – Panginoong Hesus, naparito ka upang ipahayag sa amin ang pagmamahal ng Ama.

Panginoon, kaawaan mo kami.

B – Panginoon, kaawaan mo kami.

P – Panginoong Hesus, pinatawad mo ang nagsising magnanakaw at ang nagdudang si Tomas. Kristo, kaawaan mo kami.

B – Kristo, kaawaan mo kami.

P – Panginoong Hesus, ipinahayag mong “mapalad” ang mga mahabagin at mababang-loob. Panginoon, kaawaan mo kami.

B – Panginoon, kaawaan mo kami.

P – Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B – Amen.

PAPURI

B – Papuri sa Diyos sa kaitaan sa lupa’y kapayapaan sa mga taong kinalulugdan niya.

Pinupuri ka namin,
dinarangal ka namin,
sinasamba ka namin,
ipinagbubunyi ka namin,
pinasasalamatán ka namin
dahil sa dakila mong angking kapurihan.
Panginoong Diyos, Hari ng langit,

This issue of Missalette may be downloaded for free anywhere in the world. A “love offering” for the continuation of our apostolate will be appreciated. Please, send your donation to “Word And Life Publications.” Our Savings Account is BPI – # 3711-0028-46. Send us an email of a copy of the deposit slip with your name for proper acknowledgment. See contact details on the last page. Thank You!

Diyos Amang makapangyarihan sa lahat.
Panginoong Hesukristo, Bugtong na Anak,
Panginoong Diyos, Kordero ng Diyos, Anak ng
Ama.

Ikaw na nag-aalis ng mga kasalanan ng sanlibutan,
maawa ka sa amin.

Ikaw na nag-aalis ng mga kasalanan ng sanlibutan,
tanggapin mo ang aming kahilingan.

Ikaw na naluluklok sa kanan ng Ama,
maawa ka sa amin.

Sapagkat ikaw lamang ang banal,
ikaw lamang ang Panginoon,
ikaw lamang, O Hesukristo, ang Kataas-taasan,
kasama ng Espiritu Santo
sa kadakilaan ng Diyos Ama. Amen.

PANALANGING PAMBUNGAD

P – Ama naming makapangyarihan,
sa pagdiriwang naming ito ng Pasko ng
Pagkabuhay ng Anak mo
pinag-alab mo ang pananalig namin sa iyo. Ang
kagandahang-loob mo sa amin ay lalo mo pang
pag-ibayuhin

upang maisaloob na mabuti ng lahat
ang kadalisyang dulot ng binyag,
ang Espiritung bigay mo sa iyong mga anak,
ang Dugong dumanak upang kami’y maligtas
sa pamamagitan ni Hesukristo kasama ng
Espiritu Santo magpasawalang hanggan.

B – Amen.

PAGPAPAHAYAG NG SALITA NG DIYOS

UNANG PAGBASA

Gawa 2, 42-47

Pagbasa mula sa mga Gawa ng mga Apostol

Ang mga kapatid ay nanatili sa itinuro
ng mga apostol, sa pagsasama-sama bilang
magkakapatid, sa paghahati-hati ng tinapay, at
sa pananalangin.

Dahil sa maraming himalang nagawa sa
pamamagitan ng mga apostol, naghari sa lahat
ang magkahalong pitagan at takot.

At nagsama-sama ang lahat ng
sumasampalataya at para sa lahat ang
kanilang ari-arian. Ipinagbibili nila ito at ang
pinagbilhan ay ipinamamahagi sa lahat ayon
sa pangangailangan ng bawat isa. Araw-araw,
sila’y nagkakatipon sa templo, naghahati-hati
ng tinapay sa kanilang tahanan, at nagsasalus-
salong masaya ang kalooban. Nagpupuri sila sa
Diyos at kinalulugdan ng lahat ng tao. Bawat
araw ay idinaragdag sa kanila ng Panginoon
ang mga inililigtas.

Ito ang Salita ng Diyos.

B – Salamat sa Diyos.

SALMONG TUGUNAN Sal 117, 2-4, 13-15. 22-24

B – Butihing Poo’y purihin,
pag-ibig n’ya’y walang maliw.

R. M. Velez

Bu---ti--hing Po-o'y pu---ri--hin,
pag---i---big n'ya'y walang ma-liw!

* Ang taga-Israel,
bayaang sabihi’t kanilang ihayag,
“Ang pag-ibig ng Diyos ay hindi kukupas.”
Mga saserdote
ng Diyos na Panginoon, bayaang magsaysay:
“Ang pag-ibig ng Diyos, walang katapusan.”
Lahat ng may takot
sa Panginoong Diyos, dapat magpahayag,
“Ang pag-ibig niya’y hindi magwawakas.” **B.**

* Sinalakay ako’t
halos magtagumpay ang mga kaaway,
dahilan sa Poon sila’y napipilan.
Dahilan sa Poon
ako’y pinalakas, at ako’y tumatag;
siya, sa buhay ko, ang Tagapagligtas.
Dinggin ang masayang
sigawan sa tolda ng mga hinirang:
“Panginoon’y siyang lakas na patnubay.” **B.**

* Ang batong natakwil
ng nangagtatayo ng tirahang-bahay,
sa lahat ng bato’y higit na mahusay.
Ang lahat ng ito
ang nagpamalas ay ang Panginoong Diyos,
kung iyong mamasdan ay kalugud-lugod. **B.**

IKALAWANG PAGBASA

1 Ped 1, 3-9

Pagbasa mula sa Unang Sulat ni Apostol San
Pedro

Purihin natin ang Diyos at Ama ng ating
Panginoong Hesukristo. Dahil sa laki ng
habag niya sa atin, tayo’y isinilang sa isang
panibagong buhay sa pamamagitan ng muling
pagkabuhay ni Hesukristo. Ang bagong buhay
na iyan ang nagbigay sa atin ng malaking pag-
asa na kakamtan natin ang isang kayamanang
walang kapintasan, di-masisira, at di-kukupas.
Ang kayamanang iya’y nakalaan sa inyo doon
sa langit. Sapagkat kayo’y sumampalataya,

iingatan kayo ng kapangyarihan ng Diyos samantalang hinihintay ninyo ang kaligtasang nakalaang ihayag sa katapusan ng mga panahon.

Ito’y dapat ninyong ikagalak, bagamat maaaring magdanas muna kayo ng iba’t ibang pagsubok sa loob ng maikling panahon. Ang ginto, na nasisira, ay pinararaan sa apoy upang malaman kung talagang dalisay. Gayon din naman, ang inyong pananampalataya, na higit kaysa ginto, ay pinararaan sa pagsubok upang malaman kung talagang tapat. Sa gayon, kayo’y papupurihan, dadakilain, at pararangalan sa Araw na mahayag si Hesukristo. Hindi ninyo siya nakita kailanman, ngunit siya’y inibig na ninyo. Hindi pa rin ninyo siya nakikita magpahanggang ngayon, ngunit nananalig na kayo sa kanya. Dahil dito’y nag-uumpaw na sa inyong puso ang kagalakang di kayang ilarawan sa salita. Sapagkat inaani na ninyo ang bunga ng inyong pananampalataya – ang inyong kaligtasan.

Ito ang Salita ng Diyos.

B – Salamat sa Diyos.

ALELUYA

Jn 20, 29

B – Aleluya! Aleluya!
Mapalad at maligaya
ang sumasampalataya
sa di nakita ng mata!
Aleluya! Aleluya!

MABUTING BALITA

Jn 20, 19-31

P– Sumainyo ang Panginoon.

B– At sumaiyo rin.

P – Ang Mabuting Balita ng Panginoon ayon kay San Juan

B– Papuri sa iyo, Panginoon.

Kinagabihan ng Linggo ding iyon, ang mga alagad ay nagkakatipon. Nakapinid ang mga pinto ng bahay na kanilang pinagtitiipunan dahil sa takot nila sa mga Judio. Dumating si Hesus at tumayo sa gitna nila. “Sumainyo ang kapayapaan!” sabi niya. Pagkasabi nito, ipinakita niya ang kanyang mga kamay at ang kanyang tagiliran. Tuwang-tuwa ang mga alagad nang makita ang Panginoon. Sinabi na naman ni Hesus, “Sumainyo ang kapayapaan! Kung paanong sinugo ako ng Ama, gayon din naman, sinusugo ko kayo.” Pagkatapos, sila’y hiningahan niya at sinabi, “Tanggapin ninyo ang Espiritu Santo. Ang patawarin ninyo sa kanilang mga kasalanan ay pinatawad na nga; ang hindi ninyo patawarin ay hindi nga pinatawad.”

Ngunit si Tomas na tinaguriang Kambal, isa sa Labindalawa, ay wala roon nang

dumating si Hesus. Kaya’t sinabi sa kanya ng ibang alagad, “Nakita namin ang Panginoon!” Sumagot si Tomas, “Hindi ako maniniwala hangga’t di ko nakikita ang butas ng mga pako sa kanyang mga kamay, at naisusuot dito ang aking daliri, at hangga’t hindi ko naipapasok ang aking kamay sa kanyang tagiliran.”

Makalipas ang walong araw, muling nagkatipon sa loob ng bahay ang mga alagad; kasama nila si Tomas. Nakapinid ang mga pinto, ngunit pumasok si Hesus at tumayo sa gitna nila. Sinabi niya, “Sumainyo ang kapayapaan!” Saka sinabi kay Tomas, “Tingnan mo ang aking mga kamay at ilapit dito ang iyong daliri. Ipasok mo ang iyong kamay sa aking tagiliran. Huwag ka nang mag-alinlangan, maniwala ka na.” Sumagot si Tomas, “Panginoon ko at Diyos ko!” Sinabi sa kanya ni Hesus, “Naniniwala ka na ba sapagkat nakita mo ako? Mapapalad ang mga naniniwala kahit hindi nila ako nakita.”

Marami pang kababalaghang ginawa si Hesus na nasaksihan ng mga alagad, ngunit hindi natatala sa aklat na ito. Ang mga natala rito’y sinulat upang sumampalataya kayong si Hesus ang Mesiyas, ang Anak ng Diyos, at sa gayo’y magkaroon kayo ng buhay sa pamamagitan niya.

Ito ang Mabuting Balita ng Panginoon.

B – Pinupuri ka namin, Panginoong Hesukristo.

HOMILIYA

SUMASAMPALATAYA

B – Sumasampalataya ako sa Diyos Amang makapangyarihan sa lahat, na may gawa ng langit at lupa. Sumasampalataya ako kay Hesukristo, iisang Anak ng Diyos, Panginoon nating lahat. Nagkatawang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao. Sumasampalataya naman ako sa Diyos Espiritu Santo,

sa banal na Simbahang Katolika,
sa kasamahan ng mga banal,
sa kapatawaran ng mga kasalanan,
sa pagkabuhay na muli ng nangamatay na tao
at sa buhay na walang hanggan. Amen.

PANALANGIN NG BAYAN

P— Sa araw na itong pinarangalan natin si Hesus na Hari ng Banal na Awa, buksan natin sa Kanya ang ating mga puso at manalangin nang buong kababaang-loob at pananalig:

B— **Mahabaging Hesus, dinggin ang aming panalangin.**

- * Para sa Simbahan, sa Santo Papa at sa iba pang mga namumuno: nawa’y maging liwanag at daluyan sila ng awa ng Diyos sa lahat, sa mga mananampalataya man o hindi. Manalangin tayo. **B.**
- * Para sa mga nagpapakumpisal: nawa’y laging maging karapat-dapat silang kasangkapan ng mahabaging pag-ibig ni Kristo. Manalangin tayo. **B.**
- * Para sa mga tulad ni Tomas na nahihirapang maniwala sa Muling Pagkabuhay: nawa’y sa pagsaksi ng pamayanang Kristiyano matulungan silang maibsan ang pagdududa at lumakas ang kanilang pananampalataya. Manalangin tayo. **B.**
- * Para sa lahat ng nahihirapan dahil sa sakit sa katawan, isip, o kaluluwa: nawa’y matagpuan nila ang kagalingan at aliw sa pagmamahal at pagmamalasakit ng mga mananampalataya. Manalangin tayo. **B.**

P— Maawaing Hesus, salamat sa mga kaloob ng Banal na Espiritu—ang Iyong kapayapaan at kapatawaran. Nawa’y ilapit kami nito sa Iyo at sa isa’t isa, at gawing kaming instrumento ng Iyong pagmamahal para sa lahat ng aming kapatid. Ikaw na nabubuhay at naghahari magpakailanman.

B— **Amen.**

PAGDIRIWANG NG HULING HAPUNAN

P— Manalangin kayo . . .

B— **Tanggapin nawa ng Panginoon itong paghahain sa iyong mga kamay sa kapurihan niya at karangalan,**

sa ating kapakinabangan
at sa buong Sambayanan niyang banal.

PANALANGIN UKOL SA MGA ALAY

P— Ama naming Lumikha, tungkayan mo ang mga alay ng iyong sambayanan upang ang iyong binigyan ng bagong buhay sa pagsampalataya sa iyong ngalan at pagkadalisay noong sila’y binyagan ay makapakinabang sa ligayang walang katapusan sa pamamagitan ni Hesukristo kasama ng Espiritu Santo magpasawalang hanggan.

B— **Amen.**

PREPASYO I

P— Sumainyo ang Panginoon.

B— **At sumaiyo rin.**

P— Itaas sa Diyos ang inyong puso at diwa.

B— **Itinaas na namin sa Panginoon.**

P— Pasalamat natin ang Panginoong ating Diyos.

B— **Marapat na siya ay pasalamat.**

P— Ama naming makapangyarihan, tunay ngang marapat na ikaw ay aming pasalamat lalo ngayong ipinagdiriwang ang paghahain ng Mesiyas, ang maamong tupa na tumubos sa aming lahat. Ang iyong Anak na minamahal ay naghain ng sarili niyang buhay. Siya ang tupang maamong umako sa kaparusahan

upang mapatawad ang kasalanan ng sanlibutan. Sa pagkamatay niya sa banal na krus, ang kamatayan namin ay kanyang nilupig. Sa pagkabuhay niya bilang Manunubos, pag-asa’t pagkabuhay ay aming nakamit. Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

B— **Santo, santo, santo . . .**

PAGBUBUNYI

B— Sa krus mo at pagkabuhay kami’y natubos mong tunay, Poong Hesus naming mahal, ilitas mo kaming tanan ngayon at magpakailanman.

PAKIKINABANG

B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman. Amen.

PAANYAYA SA KAPAYAPAAN

PAGHAHATI-HATI SA TINAPAY

B– Kordero ng Diyos . . .

PAANYAYA SA PAKIKINABANG

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B– Panginoon, hindi ako karapat-dapat na magpatuloy sa Iyo ngunit sa isang salita Mo lamang ay gagaling na ako.

Antipona ng Pakikinaabang

(Ipahahayag lamang kung walang awiting nakahanda.)

Ako ay iyong hawakan sa sugat sa aking kamay, sa paa kong pinakuan.

Aleluya, panaligan nang di nag-aalinlangan. (Jn 20, 27)

PANALANGIN PAGKAPAKINABANG

P–Ama naming mapagmahal, ipagkaloob mong ang aming pakikinaabang sa banal na piging ng Pasko ng Pagkabuhay ay patuloy na umiral sa aming kalooban sa pamamagitan ni Hesukristo kasama ng Espiritu Santo magpasawalang hanggan.

B – Amen.

PAGWAWAKAS

P– Sumainyo ang Panginoon.

B– At sumaiyo rin.

P– Pagpalain kayo ng makapangyarihang Diyos: Ama at Anak at Espiritu Santo.


B – Amen.

P– Humayo kayo sa kapayapaan at magbigay-saksi sa Muling Pagkabuhay sa inyong buhay araw-araw. Aleluya! Aleluya!

B – Salamat sa Diyos.

Aleluya! Aleluya!

Panahon ng Pasko ng Muling Pagkabuhay!



KRISTOKids
Gabay ng Muling Pagkabuhay ng mga bata

P150.00/kopya


• P100.00 /kopya kapag nag-subscribe sa 6 na isyu sa: www.wordandlife.org

Kumpletong gabay ng katekista para tulungan ang mga bata na maintindihan at maisabuhay ang Mabuting Balita at ang kuwento ni Kuya Hesús. Maaaring gamitin din ito ng mga pamilya sa kanilang pag-aaral, paghinayag, at pagdarasal ng Bibliya.

Katolasee
Foundation, Inc
The Annex
165 Danang St. Project 7, Veteran's Village
Quezon City, Phils 1105 • Cel. No. +63 947 999 2 999
E-mail: katolago@gmail.com • www.katolago.com
www.facebook.com/katolago

WORD AND LIFE
PUBLICATIONS
Don Bosco Compound, A. Arnaiz Ave. cor. Chino Roces Ave., Makati, Philippines
Tel. Nos. (632) 8974-5401 • 8945-1792 • 9519-2639 • Cell# (631) 717-629-5485
E-mail: wordandlifepublications@gmail.com
Website: www.wordandlife.org
Word And Life Publications / Word And Life Religious Store

Scan our QR CODES for our online shops at Shopee and Lazada.



WORD AND LIFE
PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8475-8945 • Website: www.wordandlife.org

• E-mail: wordandlifepublications@gmail.com • FB: Word And Life Publications

• Editorial Team: Fr. R. De Guzman, J. Lacandazo, V. David, R. Molomog, D. Daguin

• Illustrations: A. Sarmiento, B. Cleofe • Circulation: R. Saldua